

四庫全書

集部

欽定四庫全書

集部
元音卷二

詳校官中書_臣丁榮祚

助教_臣常循覆勘

總校官降調編修_臣倉聖脉

校對官修撰_臣吳錫齡

謄錄監生_臣鄒世俊

欽定四庫全書

集部八

元音

總集類

提要

臣等謹案元音十二卷不著編輯者名氏前有洪武甲子烏斯道序稱寧波孫原理彙輯又有曾用臧序稱為定海丞張中達所刻末題辛巳九月下澣而空其年號兩字考辛巳為建文三年殆以靖難革除剷削其板蓋猶

明初本也所錄自劉因至龍雲從凡一百七十六人每人之下畧注字號爵里大抵詳於元末而畧於元初末附無名氏詩十一首又陳益稷詩一首程文海詩四首滕賓詩一首虞集詩五首別為一卷而題曰補遺均為原目所不載其中無名氏諸篇尤為淺俗與全書體例稍異或中達刻板之時以意增入歟顧嗣立元百家詩選凡例嘗議宋公傳元詩

體要蔣易元風雅及原理是書所收均為不
廣然是書於去取之間頗具持擇雖未能盡
汰當時穠縟之習而大致崇尚風格已有除
煩滌濫之功矣乾隆四十六年十月恭校上

總纂官

臣紀昀臣陸錫熊臣孫士毅

總校官 臣陸費墀

--	--	--	--	--	--	--	--

元音序

元詩若干卷合古詩歌行律詩若干首寧波孫原理采輯陳孟誠編選定海邑丞張侯中達校正其子再昌再隆請鋟梓侯俾予敘諸篇端予謂侯之詩已板行於時膾炙人口孟誠以科第進宰古田而歸尤精於詩原理亦精於詩者也用心若是予可已於言哉昔吳之季子聘於魯請觀周樂魯命工歌二南雅頌列國之詩未嘗篇舉而什陳也而季子能審其音而知國家之盛衰後

之君子雖不能審樂之音如吳之季子荀觀詩之辭而
國家之盛衰亦庶幾可得而知歟厥後詩自漢魏至於
趙宋國家之盛衰可知矣至若元之盛衰觀其詩又不
可知歟夫士之生也雖各以已之所遭發之於歡欣閒
冶悲懷感慨之辭萬有不同然其音節調度則未始有
不同焉者其可不類而輯之以備乎一代之典也哉予
嘗見古今選詩者衆矣而必以已之好尚者為善未免
倚於一偏為識者之所陋也譬之衣服飲食人各有所

好尚未若布帛菽粟芻豢衆人之所同也衆人之所同者則善矣今夫元詩選其尤者合於三君子之手或臧或否或去或取論歸於一而定焉固非倚於一偏者也猶好尚布帛菽粟芻豢衆人之所同也以是而鏤板傳之天下後世使觀詩者知元之世運何若又以取而法焉豈不可哉洪武十七年歲在甲子冬十月既望四明山人烏斯道序

元音序

作詩為難校正尤難作而不知蹊徑刻鵠猶可冀其類
於鶩校而不知詩之高下清濁鄙雅精粗何足為校正
哉校而不能探作者之指意而妄去取之焉何益故曰
校正尤難邑人張君中達學博見高凡有前輩述作一
經於目若賈者之市物自能識其貴賤而價第之故承
于制之定海也得以閒日校正元朝百餘年間諸公詩歌
而板行之其淑人也遠矣哉近年此板幾於遍傳而君

之美意竟泯予懼夫後有怠於類編選采校理之心則
板行亦幾乎鮮矣君有子曰再隆今充邑庠生惓惓以
其尊甫校正元音而不得表白其姓名為恨故徵予言
以弁其端俾觀者開卷即可以見公之用心是亦再隆
繼志能孝之一端也

闕

辛巳九月下澣同里曾用臧

追書

欽定四庫全書

元音卷一

劉因

字夢吉號靜修容城人太子贊善

黃金臺

燕山不改色易水無新聲誰知數尺臺中有萬古情區
區後世人猶愛黃金名黃金亦何物能為賢重輕德輝
照九仞鳳鳥才一鳴伊誰腐鼠棄坐見饑鳶爭周道日
東漸二老皆西行養民以致賢王業自此成黃金與山

平不救兵縱橫落日下荒臺山水有餘清

翟節婦詩

昔金源氏之南遷也河朔土崩天理蕩然人紀為之大擾誰復維持之者而易之西山乃有婦人曰翟氏年二十餘其夫從軍死於王事出入兵刃徃復數百里晝伏夜行以其屍歸負土而葬之既葬自以早寡無子遭時如此思以義自完乃自決於墓側隣里救而復蘇終始一節今八十餘年矣夫人心之極有世

變之所不可奪者於此亦可以見之余聞之於是作
詩俾其外孫田磐刻之石使翟氏風節如在亦庶幾
乎吳人河女之章焉

兵塵浩無際烈士難自全婦人無九首志欲不二天燕
山翟氏女既嫁夫防邊一朝聞死事健婦增慨然生有
如此夫早寡非所憐求屍白刃中負土家山前事去哀
亦深義盡身可捐無兒亦何為所依惟黃泉鄉隣救引
訣烈日丹衷懸誰辨節孝翁重賦睢陽賢我昨過其鄉

山水猶清妍聞風髮如竹飄飄動踈煙千年吟詩臺峨
峨大寧顛為招馮太師和我節婦篇

大寧山有馮道吟詩臺距程居甫數

十里

燕平學僊臺

碣石來海際西南奄全燕中有學仙臺燕平欲昇天燕
平骨已朽遺臺猶相傳雖復生青松歲久推為煙極目
望海波不見三山巔三山巨鰲簪山人蟣蝨然使無不
足論信有亦可憐大塊與洪鑪金石難久堅天地會有

盡何物為神仙空山無笙鶴落日下饑鳶今古非一臺
浩歎秋風前

宋理宗書宮扇

杭州宮扇二好事者得之燕市一畫雪夜泛舟一畫
二色菊理宗題其首有興盡為期及晚節寒香之句
諸公賦詩余亦同作

天津月明啼杜鵑梁園春色凝寒煙傷心莫說靖康前
吳山又到繁華年繁華幾時春已換千古萬古合歡扇

銅雀香銷見墨痕
秋去秋來幾恩怨
一聲白鴈落西風
冠蓋散為煙霧空
百錢襪錦天留在
禍胎要鑒驪山宮
當時夢裏金銀闕
百子樓頭無六月
瓊枝秀發後庭春
珠簾晴捲天門雪
棹歌一曲白雲秋
不覺金人淚暗流
乾坤幾度青城月
扇影無情也解愁
五雲回首燕山北
燕山雪花大如席
雪花漫漫冰峨峨
大風起兮奈爾何
歸去來圖

淵明豪氣昔未除
翱翔八表凌天衢
歸來荒徑手自鋤

草中恐生銹寄奴中年欲與夷皓俱晚節樂地歸唐虞
平生磊磊一物無停雲懷人早所圖有酒今與龐通沽
眼中之人不可呼哀歌撫卷聲嗚嗚

幼安濯足圖

漢家無復雲臺功生平不識大耳公眼中天意鏡中語
此身只有扁舟東關東諸公亦英雄百年能辦山陽封
歸來老栢號秋風世事悠悠七十翁乾坤故物兩足在
霜海浮雲空復空無刀可斷華太尉有死不為丕太中

丹青皐帽凜冰雪高山目送冥飛鴻為問蘇家好兄弟
萬古北海誰真龍

長公愛文舉次公愛幼
安蓋氣質各以類云

采菊圖

天門折翼不再舉袖手四海橫流前長星飲汝一杯酒
留我萬古義皇天廟堂衮衮宗元勲誰信東籬有晉臣
南山果識悠然處不惜寒香持贈君

易臺

望中孤鳥入消沉雲帶離愁結暮陰萬國河山有燕趙

百年風氣自遼金物華暗與秋容老杯酒不隨人意深
無限霜松動巖壑天教搖落助清吟

海南鳥

越鳥羣飛朔漠濱氣機千古見真純紇干風景今如此
女國園林亦暮春精衛有情銜太華杜鵑無血到天津
聲聲鮮墮金銅淚未信吳兒是木人

過方古故居

古金大定間人常舉進士不第遂歸獨居一室置琴

書其側不妄與人交縣令佐公服候門亦以遜詞謝
遣之有田數十畝食其獲如菽熟惟食菽鄉人好事
者欲以米易之不聽曰是天所食者不可易也監察
御史按行郡邑聞其行上之不報其為人蓋亦近於
聖學之所謂獨史學之所謂獨行者歟先父每舉以
律鄉人之貪鄙者故鄉人至今能道之古歿無後具
丘隴已為樵牧區今過其居亦莽為荊棘矣不覺感
歎夫發潛德而紀先賢實後生之責也顧力未能焉

姑題詩以紀先父之訓

名姓初聞自過庭山田食力老窮經鄉閭月旦歸公論
耆宿風流尚典刑盛事重吟鳬繹集懷賢誰築聘君亭
還家遊子悲千種念舊思親淚最青

銅雀瓦

諸侯負漢已堪憐直筆何為亦魏編却愛曹瞞臺上瓦
至今猶屬建安年

題理宗煙波橫披圖

自古興衰不可常每從運氣見文章誰知萬古中天月

只辨南樓一夜涼

太祖常詠月云才到中天萬國明理宗和云併在南樓一夜涼故以寓其

意云

許衡

字仲平號魯齋河內人中書左丞儒教大宗師

趙氏南莊

曉起北窗涼清談戢羽觴入簾花氣重落紙燕泥香夢裏青山好吟邊白髮長秋風載書籍相對築茅堂

憶賈君玉

賈君清介士吾輩鮮能群守志王元伯甘貧范史雲銅臺書廢讀東郡酒方醺何日尋先約青燈共夜分

元好問

字裕之
號遺山

箕山

幽林轉陰厓鳥道人跡絕許君棲隱地唯有太古雪人間黃金貴物外祇自潔尚厭一瓢喧重負寧所屑降衷均義稟汨利妄智決得隴又望蜀有齊安用薛干戈幾蠻觸宇宙日流血魯連蹈東海夷叔采薇蕨至今陽城

山衡華兩丘垤古人不可作百念肝肺熱浩歌北風前
悠悠送孤月

西樓曲

游絲落絮春漫漫西樓晚晴花作團樓中少婦弄瑤瑟
一曲未終坐長嘆去年與君西入關春風浩蕩隨金鞍
今年匹馬妾東還零落芙蓉秋水寒并刀不剪東流水
湘竹年年泪痕紫海枯石爛兩鴛鴦只合雙飛便雙死
重城車馬紅塵起乾鵲無端為誰喜鏡中獨語人不知

欲揷花枝泪如洗

結楊柳怨

長樂坡前一杯酒鄭重行人結楊柳可憐楊柳千萬條
看看盡入行人手輕煙細雨綠相和惱亂春風態度多
路人愛此風流樹無奈朝攀暮折何朝攀暮折何時了
不道行人暗中老素衣今日洛陽塵白髮明朝塞城草
柳色年年歲歲青關情何事管離情春風誰向丁寧道
折盡柔條莫再生

杏花落後分得歸字韻

懶髓能醫病頰肥
鸞膠無那片紅飛
殘陽淡淡不肯下
流水溶溶何處歸
煮酒青林寒食過
明粧高燭賞心違
寫生正有徐熙在
漢苑招魂果是非

閻復

字子靜
東平人

遺山先生挽詩

蕭寺秋風捲玉荷
月明人影共娑娑
誰知別後驪駒曲
便是先生薤露歌
野史夜寒蟲蠹簡
錦機春暖鳳停梭

祇應前日西州路常使羊曇忍淚過

廉平章挽詩

海岳儲精五十秋早聞仙馭躡金虬梁公獨擅斗南譽
老范長懷天下憂東閣閑闕蒼蘚合西山埋玉白雲稠
鳳池人物誰優劣合在元龍百尺樓

姚樞

字公嚴號靈春柳城人學士承旨

被顧問題張萱畫明皇擊毬按樂圖

阿萱五季名畫師尤工粉墨含春姿君王遊蕩墮聲色

不知聲色傾人國開元無逸致太平天寶奢風生五兵
偃月堂近幽薊遠潛謀不入芙蓉苑咸陽行色馬嵬塵
萱筆雖工恐未真四海蒼生半魚肉歸來豈為香囊哭
一日重開日月光黃金却鑄郭汾陽

徐世隆

字威卿陳州西華人

挽文丞相

大元不殺文丞相君義臣忠兩得之義似漢王封齒日
忠於蜀將斫顏時乾坤日月華夷見海嶺風霜草木知

只恐史官編不盡老夫和淚寫新詩

郝經

字伯常陵川人侍
讀學士充國信使

巴陵女子行

已未秋九月王師度江大帥巴圖自鄂渚以一軍覘
上流遂圍岳岳潰入於洞庭俘其遺民以歸節婦巴
陵女子誓不辱于兵書詩衣帛見意赴江而死其自
叙曰巴陵女子韓希孟魏公五世孫歸於尚書賈公
之男瑀岳州破被俘之明日以衣帛書詩願好事君

子知吾宋家有節婦者其詩悲婉激切有漢魏歌謠
風氣如天果喪宋氏出門淚如漉我本瑚璉器安肯
作溺皿借此清江水葬我全首領皇天如有知定作
血面請願魂化精衛填海使成嶺殆數百言辭意壯
烈有古義士未到者余既高希孟之節且悲其志作
巴陵女子行

北來諸軍飛渡江突騎一夜滿岳陽樓頭火起入閭巷
曹伍偶走如牛羊巴陵女子尚書婦生平不識門前路

亂兵駢出勢倉皇夫婿翁姑在何處吞聲掩淚行且啼
啼痕沾濕越羅衣此身忍使人再辱裂帛暗寫臨終詩
上言社稷安危事下說投江誓天志一回宛轉一悲辛
心折魂飛不成字詩成淚盡赴江流蛾眉蕭颯天為愁
芙蓉零落入秋水玉骨直葬青海頭古來烈婦才一二
誰似巴陵更文理名與長江萬古流丞相魏公還不死

太平頂讀秦碑

岱宗太平頂磨崖皆天齊左列則天頌右刻張說辭文

采與書法不離近代規漢封宛在周觀東秦壇夏出絕
頂西壇前圓平值中峰突兀上有始皇碑年深雨漬百
裂餘折作兩峰蹲半規面陽數字仍可辨隙縫重銜苔
蘚皮中間隱約見制可完好可辨唯臣斯拳如釵股直
如筋屈鐵碾玉秀且奇千年瘦勁益飛動迴視滿山肥
更癡當時風雨有餘怒豈容夸石獨在茲祇應神明愛
尤物不肯轟擊常護持昔年韓文公曾賦岵嶇詩字青
石赤皆傳聞漫為咨嗟涕漣漉何如親登泰山日觀峯

光恠特見絳氣纏金虹摩挲細讀秦相碑天門高咏來
清風乃知山靈不相負夜宿天邊不忍去醉依雲牕重
回顧

姚燧

字端甫號牧菴洛陽人學士承旨

別王良輔

只聞官罷尚荊州不謂相逢郢水秋如我避賢三退舍
與君為客一登樓人才妄自金鳴冶世事從渠劒刻舟
明日分携武昌去應煩南夢到滄洲

楊果

字正卿
蒲陰人

羽林行

銀鞍白馬鳴玉珂
風花三月燕支坡
侍中女夫領軍事
黃金買斷青樓歌
少年羽林出名字
隨從武皇偏得意
當時事少游幸多
御馬御衣嘗得賜
年年春水復秋山
風毛雨血金蓮川
歸來宴賀滿宮醉
山呼搖動東南天
明昌太和承平久
北人歲獻葡萄酒
一聲長嘯四海空
繁華事往空迴首
懸瓠月落城上牆
天子死不為降王

羽林零落只君在白頭辛苦趨路傍腰無長劒手無鎗
欲語前事涕滿裳洛陽城下歲華暮秋風秋氣傷金瘡
龍門流出伊河水北望臨潢八千里蔡州新起髑髏臺
只合當年抱君死君家父兄健如虎一旦倉皇變為鼠
錦衣新貴見莫嗤得時失時令人悲

洛陽懷古

洛陽雲樹鬱崔嵬落日行人首重回山勢忽從平野斷
河聲偏傍故宮哀五噫擬逐梁鴻去六印休驚季子來

惆悵青槐舊時路年年無數野棠開

過狄仁傑墓

北雞聲裏紫宸寒神器都歸竊弄間一語喚回鸚鵡夢
九霄奪得鳳雛還荒墳寂寞臨官道清節孤高重泰山
為問模稜蘇相國當時相見果何顏

梁棟

四禽言

不如歸去錦官宮殿迷煙樹天津橋上一兩聲叫破汴

京無住處不如歸去

行不得也哥哥
哥湖南湖北春水多
九疑山前叫虞舜
奈此乾坤無路何
行不得也哥哥

脫却布袴貧家能有幾尺布
閒機織盡無得裁
可人不來
漁叔度脫却布袴

提壺蘆提壺蘆
今年酒賤頻頻沽
衆人皆醉我亦醉
哀哉誰問醒三問
提壺蘆提壺蘆

楊奐

字煥然號紫陽奉天人

金谷行

洛陽園池天下無金谷近在西城隅晉時花草不復見
野人猶解談齊奴齊奴豪奢誰比數酒酣愛擊珊瑚株
後堂春風滿桃李中有一枝名綠珠千金買步障百金
買艷艷時時吹笛替郎語雲牕露戶長歡娛層階欲下
須人扶豈料一日能捐軀紅飛玉碎頃刻裏空使行客
悲躊躇樓頭小婦感恩死君臣大義當何如

長安感懷

此心直欲作東周再到長安已白頭往事無憑空擊楫
故人何處獨登樓月搖銀海秦陵夜露滴金莖漢殿秋
落日酒醒雙眼淚幾時清渭向西流

讀汝南遺事二首

軹道牽羊事已非更堪行酒著青衣裹頭婢子那知此
爭逐君王烈燄歸

六朝江水故依然隔斷中原又百年長笑桓溫無遠略
竟留王猛佐苻堅

李治

字仁卿
樂城人

楊白花

帝家迷樓春晝長
紫笙吹破百花香
蒲萄凝碧琥珀光
燕語鶯啼空斷腸
枕帷紅淚洒瀟湘
玉鏡臺前添午粧
茜裙緩帶雙鴛鴦
胡蝶趁雪上釵梁
千里萬里雲茫茫

張易

字仲疇

送魯齋先生歸山

袞袞諸公入省闈
先生承詔獨南歸
道逢時否貧何病

老得身閑古亦稀
行色一杯燕市酒
春風二月故山薇
到家已及蠶生日
布穀催耕隴麥肥

林景熙

聞家大參南歸

濱死孤臣雪滿顛
冰氈齧盡偶生全
衣冠萬里風塵老
名節千年日月懸
清淚秋荒遼海鶴
古魂春冷蜀山鵑
歸來親舊驚相問
禾黍離離夕照邊

梁曾

父字貢

岳陽樓

樓前秋水健帆開
樓上涼風舞袖迴
萬里舟航通鳥道
四時雲雨護龍堆
江山如此不一醉
歲月幾何能再來
欲問老髯求鐵笛
月中吹上紫荊臺

宋衙

次范約莊韻

家近西湖六月涼
蘭舟桂醕芰荷裳
海門潮上波濤壯
天竺風來草木香
今日悲秋哦楚些
他年著論辨吳亡

君才位置聞人說宜侍詩仙七寶牀

李鳳

睢陽懷古

睢陽城郭劫灰餘風景蕭條市井疎堤接汴梁分驛路
地連齊魯幾兵車張巡戰壘沙沉戟闕伯提封草滿墟
珍重開元遺寺在石幢猶刻魯公書

盧摯

字處道號疎齋涿
郡人學士承旨

題釣臺

雲山蒼蒼兮煙木稠石瀨潺潺兮江水流故人兮冕旒
先生兮羊裘使人皆先生兮誰其伊周使人不先生兮
誰其巢由仕止久速兮舍聖人將安求清風一絲兮豈
為名鉤蕉黃荔丹兮香火千秋山下幾篙兮榮辱之舟
先生一笑兮白雲收

題淵明歸去圖

留侯晚節從赤松武侯早歲稱卧龍仇秦復漢身始終
淵明初非避俗翁兩侯大節將無同陽秋甲子法王正

特筆宛有長沙雄易地灞上祁山功王宏何恨奉吾足
督郵能芥平生胸歸來種豆南山中斜川只許桃源通
門前五柳春濛濛落絮不與江波東環堵蕭然吾未窮
北牕儘有羲皇風畫圖不盡千古意詩成一笑浮雲空

采薇圖

服藥求長年孰與孤竹子一食西山薇萬古猶不死

周馳

字景遠聊城人
監察御史

題五王醉歸圖

晉陽首事成功烈卒入宮門流戰血至親骨肉忍相殘
禍至黃臺那可說讓帝知幾辭寶位履霜知是堅冰至
華萼相輝絜使然遂許明皇敦友弟當時行樂殊未央
賜予無節恩非常出則同遊入同宴五龍躩蹠騰康莊
時光鼎鼎如流電虛偽既消誠實見三子無辜死渭橋
太真有寵來金殿欲心一縱禍滔天社稷生靈不暇憐
從此陵夷於五代干戈喪亂過年年

李孟

字道復

初科知貢舉

百年場屋事初行一夕文章聚帝京
豹管敢窺天下士龍頭誰占日邊名
寬容極口論時事衣被終身荷聖情
願得真儒佐明主白頭應不負平生

貫雲石

號酸齋

桃花巖

白兆山桃花巖太白有詩近人建長庚書院來京師
時中書平章白雲相其成求詩於詞林臣李秋谷程

雪樓陳北山元復初趙子昂張希孟與僕同賦

美人一別三千年思美人兮在我前桃花染雨入白兆
信知塵世逃神仙空山亭亭伴朝暮老樹悲啼發紅霧
為誰化作神仙區十丈風煙挂淮浦暖翠流香春自活
手撚殘霞背天末幾回雲外落清嘯美人天上騎丹鶴
神遊八極栖此山流水杳然心自閒解劍狂歌一壺外
知有洞府無人間酒酣仰天呼太白眼空四海無纖物
明月滿山招斷魂春風何處求顏色

美人篇

仙風雕雪玲瓏溫吳姬剪雪纖纖昏行雲補髻翠光滑
鳳凰叫落空山月手摘閒愁八字分春山恨重畫不伸
肌濃汗膩朱粉勻背人揮淚粧無痕霜刀自裂石榴裙
閉門不識諸王孫綠煙熏透藍田玉羅帶隨風換粧束
飛鳥銜怨過長門芳菲不忍韶華屋連環步窄玉佩響
霓裳袖闊春風長釧鬆腕瘦覺多情舉手搔天天亦痒
錦香帳冷蘭燈沉落花不入芙蓉衾三山路杳銀河深

金人卷一
彩鸞高訴愁人心天與美人傾國色不如更與美人節
夢裏梅花夢外身萬古千年對明月

君山行

北溟魚皆幾千里負我大夢遊弱水蓬萊隔眼不盈拳
碧落香銷吹不起茜裙女兒懷遠遊遠人不歸明月羞
寶釵綰髻翠欲流風鬟十二照暮秋女媧煉石補天手
手拙石開露天醜瓊樓玉宇亦人間直指示君君見不
斯須魚去夢亦還白雲與我遊君山

別離情

吁別離之苦兮蒼梧之野春草青黃陵廟前春水生日
暮湘裙動輕翠玉樹亭亭染紅泪又聞垓下虞姬泣斗
帳初驚楚歌畢佳人閣淚棄英雄劒血不銷原草碧何
物謂之別離情肝腸剝剝如銅聲不如斫其竹剪其草
免使人生為情老

蘆花被

僕過梁山泊有漁翁織蘆花為被僕尚其清欲易之

以紬者翁曰君尚吾清願以詩輸之遂賦果却綢
採得蘆花不浣塵翠蓑聊復藉為裯西風刮夢秋無際
夜月生香雪滿身毛骨已隨天地老聲名不讓古今貧
青綾莫為鴛鴦妬欸乃聲中別有春

陳孚

字剛中號勿齋天台人衢州治中

出門別親友

停君漢水浮鴨之翠杓聽我嶧山栖鸞之綠桐男兒拂
衣出門去龍泉三尺光如虹君不見磻溪鶴髮釣魚者

偶擲漁竿來牧野白旄麾開炮烙煙桓主朱芾侯青社
又不見南陽卧龍人不識一朝佐漢坐狼石羽扇輕搖
蛇鳥驚火精焰焰天西極旗亭四月柳如藍紫騮嘶風
黃金驂豈無叩牛歌亦有捫蝨談天生巉崑崙律骨蒿
萊槁死誰能甘我欲登泰山扶筇欵天關東溟若木如
可攀手弄日月青雲間我欲渡黃河赤脚凌秋波水仙
樓閣高嵯峨徑叱海若笞蛟鼉停君翠杓聽我綠桐真
人開天六合同風騶虞鳳凰飛舞錫宮有線五色獻於

重瞳補舜衣裳山龍華蟲虎豹九關兮不可以達吾則
脫冠歸來兮丹丘之青峰長揖二三子目送西征鴻

別離曲

杏花紅壓紗牕雨畫欄孤禽弄嬌語翠綃曉帳雙蛾愁
淚濕菱花怨歌舞龍香記昔調哀弦一絲指撥春風前
羅衾未煖驪駒發柳條折盡長亭寒燕釵分恨藏塵玉
夢斷雲深楚江綠舞鸞折翅錦字空魚目晴波接紅燭
江南賈客千黃金停鞭欲換天涯心從教門外苔痕老

繡鞋不過屏山陰

居庸關

車稜稜石确确車聲彭彭鬪石角馬啼蹴石石欲落不
知何年鬼斧鑿僅與青天通一握上有藤束萬仞之崖
下有泉噴千丈之壑太行羊腸蜀劍閣身熱頭痛懸度
索一夫當關萬夫却未必有此奇巘嶢吾皇神聖混地
絡烽火不紅停夜柝但有地險今猶昨我扶瘦筇息倦
脚欲扣往事雲漠漠平沙風起鳴凍雀

葛嶺行

葛嶺相君之故居昔年甲第臨通衢
錢橫花間甃作逕錦鋪泉底疏
為渠後庭三千傾城姝歌舞絕世水肌膚
麒麟銀裳龍銷裾佩以文羅木難珠
相君出擁萬虎士各操闌戟左右趨
劒履上殿帝賜坐馳蹄七寶分御厨
望塵拜者頌元老伊尹周公所不如
豈知一旦事瓦裂銀鐺鐵鎖載以驢
我偶過此訪廢址狐兔縱橫草焦枯
琨臺瓊砌不復見已有野人來種蔬
却怪當時鑿隧道

挾詐出入潜如狙大臣一身佩天下版廩複壁何謬歟
山童從我一壺酒迴首落日悲歛歛摩挲仆碑共踞坐
尚是御賜凌煙圖

銅雀臺

古臺百尺生野蒿昔誰築此當塗高上有三千金步搖
滿陵松柏圍鳳綃西飛燕子東伯勞塵間泉下路迢迢
龍帳銀箏紫檀槽怨入漳河翻夜濤人生過眼草上露
白骨何由見歌舞獨不念漢家長陵一抔土玉匣珠襦

鎖秋雨

金陵

六代帝王州寒煙滿石頭星河天北轉江漢水東流步
絕金蓮雨歌殘玉樹秋白頭有漁者猶說景陽樓

樓桑廟

古廟千年後桑陰滿涿州亂山空北向大火已西流遺
恨三分國英風百尺樓里人牲酒奠想像冢龍浮

開平即事

天開地闢帝王州
河朔風雲拱上游
鵬影遠盤青海月
鴈聲斜度黑山秋
龍岡上繞三千陌
月殿香飄十二樓
莫笑青衫窮太史
御煙曾見袞龍浮

邯鄲懷古

數點寒峰擁翠嵐
叢臺日落見漳南
火枯襄子殘銅斗
土蝕平原舊玉簪
宮閉沙丘空有雀
兵吞函谷已如蠶
回仙逆旅今存否
世上黃梁夢正酣

鄂渚晚眺

金史卷一百一十五
卷一
黃鶴樓前木葉黃白雲飛盡岼茫櫓聲搖月歸巫峽
燈影隨潮過漢陽庾令有塵汙簡冊禰生無土蓋文章
闌干只有當年柳留與行人記武昌

鳳凰山

浮屠百尺聳亭亭落日鴉啼野蔓青故國盡銷龍虎氣
空山猶帶鳳凰形金根輦路迎神駕玉樹歌臺語梵鈴
惟有錢塘江上月年年隨鴈過寒汀

鳳凰臺

鳳凰臺上野烏啼。鼓連雲日又西。天地無情潮寂寞。
英雄有恨黍高低。殘桁夜雨迷朱雀。荒塚秋風怨白雞。
空有斷碑蒼蘚裏。千年留得謫仙題。

交址使還

少年偶此請長纓。命落南州一羽輕。萬里上林無鴈到。
三更函谷有雞鳴。金戈影裏丹心苦。銅鼓聲中白髮生。
已喜歸來身健在。夢回猶覺瘴魂驚。

平江

滄浪亭下望姑蘇千尺飛橋接太湖故里空傳吳稻蟹
寒祠猶記晉萸鱸芙蓉夜月開天鏡楊柳春風擁畫圖
為問館娃歌舞處鶯花還似昔年無

送羅子有奉亦愚右丞之喪歸杭

風沙萬里一征鞍短帽朱髯淚未乾廣武山川空阮籍
長平賓客只任安故園有夢鶻聲急大廈無依燕翅寒
江左故人如見問為言燈火客金鑾

丞相安 闕 延說四書因以詩呈

帶礪家聲耀八寰中書獨壓紫薇班捧持日月祥雲上
洗滌山河湛露間綠竹正歌淇澳美赤松聊伴穀城間
聖門別有經綸事更對青燈話孔顏

泊安慶府呈貢父

共擁旌幢度百蠻今朝忽過皖公山幸承乙夜君王問
更喜丁年奉使還舊夢未迷天祿閣新愁猶憶鬼門關
塵纓笑濯滄浪水少伴沙鷗半日閒

與李子構讀天寶遺事

四十乾坤拱紫宸東風只屬倚闌人玉鳬波暖驪山曉
金犢煙橫綉嶺春七夕有釵留羽客千秋無鏡泣孤臣
紅塵一騎君休笑中有漁陽萬騎塵

汴陽龍德故宮

書來海上勸休兵已見金輪逐火精醮絕絳樓無鶴唳
朝空丹扆有狐鳴羽袍士尚傳三洞介幘人誰報六更
一代興亡真大夢陳橋驛畔見青城

淮陰侯廟

漢家羅網正高張誰有勲名記太常戲爾登壇呼大將
危乎操印立真王煙中草木疑殘幟沙上風濤憶故囊
鐘室十年君莫怨未央宮殿已斜陽

日南感懷

老母粵南垂白髮病妻燕北待黃昏蠻煙瘴雨交州客
三處相思一夢魂

博浪沙

一擊車中膽氣高祖龍社稷已驚搖如何十二金人外

唯有民間鐵未銷

祝蕃

字蕃遠上饒人饒州教授

即席和貫學士月氏王頭飲器歌

單于寶刀寒映雪月氏髑髏飲冤血泥丸真人辭絳宮
麴生時能醉其骨關氏夜張蒲萄香拍拍春霞灑秋月
賢王起舞谷蟲歌傳飲歡呼兩耳熱燈前人影半闌殘
燈後青燐已明滅持杯為爾澆嶙峋胡為對此傷精魂
弓蛇猶能致惑疾智瑤豈是無心人頭顱如此當速朽

生擒誤入仇家手忍將鳴鏑射頭曼吁嗟降王爾何有
後來漢使渚水東猶待留犁撓盟酒

揭祐民

字希韋
盱江人

瘠馬圖

念汝出塞下四蹄疾如飛半夜馳臨關氣奪戎王圍被
鐵踏河水幾度向武威將軍事百戰騰力不須肥祇令
飲源流齒老不任機坡寒莫風酸沙瘠春草微百感畫
者意要見駿骨稀但看古英賢一世常寒饑

何失

字得之
昌平人

感興四詩

大寶隱於石哲匠莫辨真猛虎走四野尺草豈蔽身來
者虎不見投石安足珍所以卞和泣千載共沾巾

飲酒莫啜漓結交當求知論人先論行相馬不相皮一
謫予何敢三讒親亦疑投身入屠釣猶勝坐書癡

人皆欲富貴我豈願貧賤貴賤一差池如藥勿瞑眩幼
學苦不多夜思曾得半今也髮盡白梳頭雪滿面長恐

愧鄉閭一朝死愚懦

渥注騏驎兒自有絕塵足錦障過都門飛來射衆目歎
彼轅下姿亦非駑駘物世乏伯樂儔誰識千金骨所以
荷蓑士煙水日淪沒

招賈元播馬德昌飲

積雨釋炎熱涼颼變清商薄帷納朝景倏爾頽西廂念
我二三子不來復一觴言笑吐蘭菊芬芳粲中堂仰慕
不昨日忽別若殊方况各迫桑榆何以永夕光

方鏡

十八事舅姑機杼任蓬首照面不照心
照心妾不醜

何中

字太虛
臨江人

贈元復初

暖雲流青堤光風轉芳甸遠在天一涯
幽沉限聞見點點秋歸鴻翩翩春來燕
天路萬里通胡為絕遐睠竒姿奪南國
悵望愧踈賤良會懃宿心願君畢歡宴

知非堂夜坐

前池荷葉深微涼
坐前爽人歸一犬吠
月上百蟲響
余非洽隱淪隙地成
偃仰林端斗柄斜
撫心獨悽愴

風雨

池上風雨來柴扉人跡絕
隔水煙氣生林峯半明滅
蛤吠秋草深魚驚晚荷折
孤坐倚匡牀微紅隱天末

元音卷一

欽定四庫全書

元音卷二

陳益稷

交趾王

大明殿侍宴

班陪玉笋侍紅雲日表熙熙瑞氣溫
萬派朝宗滄海闊
衆星環拱紫宸尊
雍容湛露歌詩什
彷彿鈞天入夢魂
孤孽秋毫皆帝力
願殫忠赤報深恩

挽河南王

哲人萎矣棟梁傾回首西風涕暗零三世功名今古史
百年過客短長亭手扶紅日名猶在身就黃梁夢不醒
記取汾陽舊勲業紫薇留種繼芳馨

駕畋柳林隨侍

仙仗平明擁翠華景陽鐘發海東霞千官捧日臨春殿
萬騎屯雲動曉沙白鷗韞翻山露薄黃龍旗拂柳風斜
太平氣象同民樂南北梯航共一家

送元復初

江流脉脉草離離黃鶴磯頭酒一卮報國寸心憐我老
論交半面識君遲正當重鼎調梅日又是長亭折柳時
滿載詩書歸路穩鳳城依約更相期

趙世延

代祀南岳登祝融峯

天風吹我躡雲根一覽羣山蟻垤紛瀛海波翻初日上
石壇人語半空聞炎荒作鎮荆吳遠元氣浮形天地分
何日束書煨芋室孤峯絕頂看浮雲

趙半閒

去婦詞

里有孀婦子不檢而無室既疾病乃亟為娶且命之
曰為汝娶為宗祀計也未幾死而子竟違母言尋出
其婦婦以衰麻在身義不得去被迫逐不可留因為
詩以寫懷云

落葉不返柯去婦無歸年歛袂出故幃獨影心悽然君
心紙鳶飛萬里難拘牽妾如鬢邊花未衰先棄捐憶昔

初嫁君姑病在牀前歲月能幾何
衰麻奉姑筵妾今辭門去撫棺
淚如泉九原會有知當為去婦憐

鮮于樞

字伯機

過桐廬漏港灘示同舟人

驚流激長灘百折怒未已篙師與水爭
退尺進纔咫尺窮解衣下力排過乃止
維時春冬交冰雪寒墮指我時卧舟中
起視顙有泚迂踈一何補辛苦愧舟子

華鯨引

石上桐孫美如玉化作長鯨喚僧粥香巖一擊六根開
剥落皮毛換凡骨中郎却顧中散驚初非爨下鳴不平
批鱗拔角就繩墨龍門綠綺瘖無聲昔聞北溟魚化作
天池鵬今見橫海姿解作威鳳鳴蕭然敗棺材蠢爾牛
闌撐龍騰虎變固有待不遇賞音徒爾靈君不見飯牛
自賣亦何者逢時自致千秋名

望嶧山

東方巨鎮宗岱宗羣山列侍臣妄同西南崛起一萬仞

却立不屈如爭雄何年天星下天宮墜地化作青芙蓉
外如刻削中空同閭風玄圃遙相通我昔東遊訪青童
群仙招我遊中峰悔不絕粒巢雲松失身誤落塵網中
如今可望不可到艤舟空羨冥飛鴻神仙可學事亦晚
安用屑屑悲秋蓬吾聞嶧陽有孤桐鳳凰鳴處朝陽紅
安得斲為寶琴獻天子為民解慍歌南風

建德溪行

山截溪將斷川迴路忽通鳥飛青嶂裏人語翠微中玄

圃參差是桃源想像同平生苦行役翻愛打頭風

石橋山留題

旁通日月上星辰有路遙應接玉京仙奕未終人物換
秦鞭不到海波平當時混沌知誰鑿他日崆峒強自名
枯樹重榮事尤異欲從樵者問長生

程文海

字鉅夫號雪樓廣平人

題許仁仲詩卷

殘雪詞林退食時小牕開卷鬢如絲音傳正始誰同調

氣逼元和稍自持文字不隨前輩盡風流只許後人知
霜清月冷梅花瘦獨對熏爐看欲疑

趙孟頫

字子昂號松雪吳興人學士承旨

古風十首

詩亡春秋作仲尼益苦心空言恐難託指事著以深大
義炳如日萬古仰照臨鳳鳥久不至楚狂乃知音愁來
不得語起坐彈吾琴

周衰有戰國紛紛極荆榛黃金聘辯士駟馬迎從人朝

為刻骨讎暮作軟血親終然志力屈奉身俱入秦
相如賦大人出語頗竒怪飄然凌雲意過耳誠一快誇
言入無際自覺塵俗隘安知翻成勸何用名為戒

自有天地來蓬萊幾清淺人生空皓首舉世誰得見
臺在何許渺渺煙波遠方舟不可渡使我空輾轉

絕代有佳人被服綺與紈蛾眉秀聯娟吐詞馥若蘭清
歌啓皓齒瑤琴發哀彈一彈再三歎聽者涕汎瀾借問
誰家子為言本邯鄲

秋風吹亭樹故葉紛以墜明月耿夜長草蟲促經緯四
序苦不淹少壯何足貴輾轉復輾轉寤擗不能寐昔為
閨中秀今作市門鄙豈無膏與沐甘心得憔悴

山深多悲風日暮愁我心玄雲降寒雨松柏自哀吟人
生百年後奄然閤重陰念此每不樂天路何由尋仙人
偓佺輩消搖在青岑奈何不爾思委命重黃金

海中有奇樹粲粲珊瑚枝由來植物性無脛可推移如
何石氏子樹之白玉墀洛陽經幾戰金谷久荒夷徒令

千載下聞者為傷悲

烈風號枯條落葉滿周道原野何蕭索川流亦浩浩離
居日以遠懷思令人老功名會有時生平苦不早顧瞻
靡所騁憂心慙如擣

浮雲何方來不知竟安之飄颻隨風去汗漫以為期自
昔功名士徃徃事驅馳白駒空谷中誰能加繫維皎皎
難見容翻受世妍媸虛名誠無益不見斗與箕

逸民詩

驅車秣駑馬吾將適齊國聞有魯連子個儻好竒畫一
談秦師走再說聊城拔功成不受賞高舉振六翮布衣
終其身豈復為世役茫茫千載遠安往訪遺跡躊躇東
海上向風長太息

四時相代謝榮耀安足恃瓜田引新蔓不見桃與李知
士解其會遇坎當復止邵生故秦吏乃亦睹茲理賢哉
感我懷三歎不能已

子真初亦仕歲晚乃逃之區區南昌尉上疏忘其卑忠

言不見用耿耿當告誰飄然棄妻子終身與世辭抱關
甘貧賤所貴莫我知至今九江濱清風激群黎神仙信
茫昧此士獨不疑孤雲無定在逝水何時歸遐思一矯
首悵望何由期

悠悠空山雲泱泱長江流廊廟意不屑山澤聊淹留故
人在天位高步追巢由豈曰子無衣辛苦被羊裘東京
多節義之子乃其尤窮居雖獨善輔世豈不優

汪汪千頃陂不為人濁清道周言行表蕩然無得名誰

言牛醫兒乃是人中英當時無間言後世流德聲思之
不可見使我鄙吝萌淳風久已漓此意豈復明時無君
子者雖賢寧見稱

南州有高士食力事畊稼優游聊卒歲不矯亦不隘大
木行欲顛絳纚豈足賴何為諸老翁栖栖不遑舍斯言
非無見明哲自高邁誰能懸一榻待子來稅駕

鹿門何亭亭下有避世賢鳳雛隱中林卧龍蟠其困一
朝起高翔斯人獨深潜功名不可為我志久已安一聞

耆舊傳使我心悠然

黃鵠羽翼長一舉思千里
幼安本中原乘槎走東海
舉世方尚同遠引存吾志
流風漸異俗敦禮化鄰鄙
子魚平生反胡乃不相委

塵事非所便田園久見招
歸來三徑中蔚蔚長蓬蒿
雖有荷鋤倦濁酒且自陶
茫茫大化中委運將焉逃
唐虞去已遠由來非一朝
粲粲霜中菊采采忘其勞

烈婦行

至元七年濱州軍士劉平之戍棗陽與其妻胡俱道宿車下平為虎所得起追及之殺虎脫其夫吾聞之中原賢士大夫如此乃為感激慷慨作烈婦行以誨之

客車何燁燁夫挽婦為推問君將安去言往棗陽戍官事有程宿車下夜半可憐逢猛虎夫命懸虎口婦怒髮指天十步之內血相濺夫難再得虎可前寧與夫死毋與虎生呼兒取刃力與爭虎死夫活心始平男兒節義

金史卷之三
卷二
有如此萬歲千秋可以奉明主馮婦下莊安足數

題商德符學士桃源春曉圖

宿雲初散青山濕落紅繽紛溪水急桃花源裏得春多
洞口輕煙搖綠蘿綠蘿搖煙挂絕壁飛流直下三千尺
瑤草離離滿澗阿長松落落凌空碧雞鳴犬吠自成村
居人至老不相識瀛洲仙客知仙路點染丹青寄輕素
何處有山如此圖移家欲向山中住

送朱仲陽太平教授

列仙之儒山澤臞手中黃紙新除書敎官雖冷實清選
當塗山川如畫圖我生無能百不如盍不從君賦歸歟
請君為我酹太白矯首南望心煩紆

謝鮮于伯機惠琴

云是許旌陽手植桐作

仙人已歸白雲中空餘手植青枝桐根柯盤鬱如蛟龍
一朝霹靂驅雷公烈火半爇隨狂風箕子之裔多髯翁
才氣邁俗驚愚蒙抱持來歸尋國工斲為二琴合商宮
我來自北欣相逢持一贈我為我容自吾得此不敢寐

中夜起坐彈秋鴻下絃清冷上黃鐘轉絃更張涕滿胸
黃虞已遠將無同恨君不識牙與鍾恨我不識瞽與矇
周南大雅當誰從

題黃素黃庭後

此書飄飄有仙氣意其為楊許舊跡蓋人間至寶伯
機所藏也

琴心玉文洞玄金紐朱錦乃汝傳子孫得之可長年
黃素纈栗完且堅橫理如髮約兩邊縱有赤道如朱絃

文居其間走玄螳飛雲卷舒相終始大道甚夷非力便
無為自然有至理誰能精專換骨髓掃除俗塵不瑕穢
目中有神乃識真白玉為軹環車輪裏以天上翠織成
仙人樓居儼長生鸞鶴翔舞猿猱輕子能保之慎勿驚
宮室之中夜自明上清真人楊與許焚香清齋接神語
手作此書留下土千年流傳子為主東方青龍西白虎
廉不索兮貪勿與

題二喬圖

長江東去水涵涵誰謂河廣不容舸中有喬家女兒淚
何意師昏隨二豪龍虎相爭欲相啖鸞鳳鍛羽將安逃
不見當時老諸葛獨聘醜婦何其高

贈永清曹縣尹

赤縣郎官宰清朝學士班雲端雙履冷花裏一琴閒鴻
鵠宜天路麒麟近帝闕無當從此召豈待及瓜還

送吳禮部奉旨詣彭湖

為國建長策此行非偶然止戈方見武入海不求仙朱

紱為郎日金符出使年早歸承聖渥圖像上凌烟

送翟伯玉雲南省都事

萬里雲南路青山落照邊省郎新紫綬幕府舊紅蓮見
面嗟吾晚觀文覺子賢祗應清淑氣不受瘴溪烟

題孫安之松楸圖

墳墓在萬里宦遊今五年誰人無父母掩卷一潸然
過牧廢苑

一片中原地紛紛幾戰爭至今將不去留與後人耕

萬歲山

萬歲仙山聳碧空，廣寒宮殿最當中。
雲移錦石通三島，路遶銀河接兩宮。
孔雀花濃深駐日，鳳凰枝老細含風。
年年歲歲經遊輦，自是昇平樂未終。

壽布呼相公

新築沙堤凍未晞，雪餘愛日轉春暉。
黃鍾律應迎中氣，執法星明拱太微。
儀鳳自因夔樂至，祥麟寧假豸冠威。
明堂政爾須梁棟，赤日行看副衮衣。

溪上

溪上春風吹柳花
溪頭春水淨無沙
白鷗自信忘機事
玄鳥猶知有歲華
錦纜牙檣非昨夢
鳳笙龍管是誰家
令人苦憶東陵子
擬向田園學種瓜

題岳武穆王墓

岳王墳上草離離
秋日荒涼石獸危
南渡君臣輕社稷
中原父老望旌旗
英雄一死嗟何及
天下中分遂不支
莫向西湖歌此曲
水光山色不勝悲

聞擣衣

露下碧梧秋滿天砧聲不斷思綿綿北來風俗猶存古
南渡衣冠不復前首宿總肥宛騷囊琵琶曾泣漢婁娟
人間俯仰成今古何待他年始惘然

和姚子敬秋懷五首

落日孤城動鼓鼙樓中畫角不勝吹山川蕭瑟秋雲淨
草木凋傷暮雨悲多病馬卿聊假日數奇李廣不逢時
卷簾白水青山外隱几無言有所思

吳宮烟冷水空流慘淡風雲黯九秋禾黍故基曾駐輦
芙蓉高閣迥添愁綉楹錦柱蛟龍泣金沓瑤階鹿豕遊
宋玉平生最蕭瑟欲將九辯賦離憂

銅雀春深漢苑空邯鄲月冷照秦宮烟花樓閣西風裏
錦繡湖山落照中河水南來非禹迹冀方北去有唐風
溪城秋色催遲莫愁對黃雲沒斷鴻

搔首風塵雙短鬚側身天地一儒冠中原人物思王猛
江左功名愧謝安首蓓秋高戎馬健江湖日短白鷗寒

金尊綠酒無錢共安得愁中却暫歡

野曠天低木葉疎水清沙白鳥相呼胡笳處處軍麾滿
鬼哭村村漢月孤新亭舉目山河異故國傷神夢寐俱
黃菊欲開人卧病可憐三徑已荒蕪

送陳都事雲南銓選兼問李廉訪

送君銓選使滇池部落諸夷自品題明月夢回夔子北
長風吹度夜郎西山連塞雨驂騑滑花落蠻雲杜宇啼
為問霜臺李學士白頭官滿尚羈栖

壽王趙公八十

儒仙弭節下蓬瀛
燕處超然鶴骨清
周室龍韜師尚父
漢廷鳩杖賜桓榮
中州大國封全趙
東閣賢良位列卿
白髮同僚欣盛事
年年來此慶長生

杭州拱北樓

城上高樓接暮霞
令嚴鐘鼓靜無譁
提封內向三千里
比屋同封百萬家
心在江湖存魏闕
身隨牛斗泛仙槎
舉頭便覺長安近
時倚闌干望日華

東陽八詠樓

山城秋色靜朝暉極目登臨未擬歸羽士曾聞遼鶴語
征人又見塞鴻飛西流二水玻璃合南去千峰紫翠圍
如此山川良不惡休文何事不勝衣

送吳思可總管汀州

七閩南去路崎嶇五馬承恩出帝都地氣喜聞今有雪
民生寧似昔無襦山城酒美傾鸚鵡旅館春深聽鷓鴣
它日相思應悵恨離筵不忍賦驪駒

送閻子靜廉訪浙西

翰林華蓋逼青冥，憲節乘驄出帝城。
海內文章歸渾厚，浙西民物望澄清。
姑蘇落日荷花淨，震澤秋風橘柚明。
憶向玉階承草詔，早開黃閣慰蒼生。

送戴真人歸越

躍馬年年塞北遊，春風此日送歸舟。
山中樹老飛玄鶴，江上莎長卧白鷗。
未許謝公同隱逸，肯容賀老獨風流。
山陰道士如相會，沽取松醪醉未休。

餞董尊師還山

太極山人壽且康
法宮高砌佩琳琅
山中學道降龍虎
天上觀光翳鳳凰
玉璽曾蒙五色詔
金尊還賜九霞觴
于今更許歸山去
萬里雲林江水長

送張秋泉還山

上界仙人不可招
九重丹詔許逍遙
已從萬里開真館
又入天台訪石橋
紅日玉堂香冉冉
碧雲金水路迢迢
何年再覓神州觀
芝草琅玕雨露饒

送吳真人謁告歸為二親八十之壽兼降香名

山

許邁楊羲奕世仙木公金母共長年斑衣歸戲鄱君側
絳節朝辭玉帝前去去青牛隨紫氣飛飛白鶴繞香烟
大椿自得人間壽八十從今數八千

送蕭萬戶鎮閬州

錦屏山下蜀江清閬州城南春意生投壺今見詩書帥
樹羽遙連鼓角營遠戍固須煩將畧雜畊因足見民情

梅花到日應如雪折取繁枝一寄聲

贈特穆爾總管

將軍鐵馬擁琯弓壯歲分符鎮越中山水多情留賀監
兒童拍手愛山公紫髯似戟君猶壯白髮如絲我已翁
悅禮敦詩殊不忝看君真有古人風

海子上即事

小姬勸客倒金壺家近荷花似鑑湖游騎等閒來洗馬
舞靴輕妙迅飛鳧油雲判汗纏頭錦粉汗生憐絡臂珠

只有道人塵境靜一襟涼思詠風雱

錢塘懷古

東南都會帝王州三月鶯花非舊遊故國金人泣辭漢
當年玉馬去朝周湖山靡靡今猶在江水悠悠只自流
千古興亡盡如此春風麥秀使人愁

登金陵雨花臺遂至故人劉叔亮墓

雨花臺上看晴空萬里風烟入望中人物車書南北混
江山襟帶古今同魚龍未蟄霜先隕鳳鳥不鳴江自東

綠髮劉伶緣醉死，往尋荒塚醉西風。

趵突泉

趵水發源天下無，平地擁出白玉壺。
谷虛只恐元氣泄，歲旱不愁東海枯。
雲霧潤蒸華不注，波濤聲震大明湖。
時來泉上濯塵土，冰雪滿懷清興孤。

次韻左轄相公

昔年閭里自浮沉，郎省那知遂有今。
老去馮唐堪底用，愁來莊舄向誰吟。
上林柳葉春猶淺，西塞桃花水正深。

知己如公居鼎鼐不應長此泣南音

題趙子敬御史志養堂

志養堂前驄馬蹄融融喜氣動庭闈能令將種為書種
可是斑衣勝繡衣手樹叢萱侵雪色心同寸草報春暉
不須更上陳情表親壽康強世所稀

絕句三首

春寒惻惻掩重門金鴨香殘火尚溫燕子不來花又落
一庭風雨自黃昏

卷二
千枕花前簾欲流日催紅影上簾鉤
窺人鳥喚悠揚夢
隔水山供宛轉愁

庭槐風靜綠陰多睡起西牕日影過
自笑老來無復夢
閒看行蟻上南柯

杭州雨中

江南十日九風雨花柳欲開無好春
却憶京城二三月
秋千風暖漲香塵

部中莫歸寄周公謹

日莫空堦生白烟歸來羸馬不勝鞭明朝又逐雞聲起
辜負日高花影眠

和黃景慶雪中即事

公事幽閒子不知微官束縛我堪嗤年來筆硯荒蕪甚
旋理耰鋤墾惡詩

梅花

瀟洒江梅似玉人倚風無語澹生春曲中桃葉元非似
夢裏梨花恐未真

湖上莫歸

春陰柳絮不能飛
雨足蒲芽綠更肥
祇恐前訶驚白鷺
獨騎款段繞湖歸

題水仙

翠袖盈盈不受扶
天風縹緲降麻姑
便應從此東吳去
幾見蓬萊弱水枯

題杜陵浣花

春色醺人苦不禁
蹇驢馱醉晚駸駸
江花江草詩千首

老盡平生用世心

采桑曲

野雉朝雊雊且飛誰家女兒采桑歸欲折花枝揷了髻
還愁草露濕裳衣

元明善

字復初清河人湖廣參政

跋南嶽壽寧觀碑後

朱陵靈臺天柱巍太虛寶洞綠烟扉上館赤帝朱鳥飛
祝融宅內參為旗義娥兩曜愁蔽虧象緯冷逼嗟位迷

四觀燕吳與秦齊恒嵩泰華孰崇卑五氣順布百志熙
流祥萬物宣后祇雨風露雷豈其私惠爾下土尸者誰
中有異人餐赤芝夜眠秋霞晝天倪衣以青雲裳白霓
風車八極騃兩螭七十二峰足幽棲琳宮貝闕輝陸離
潛光煉魄如嬰兒大丹入咽無渴饑誰具思之吳宗師
神變倏忽方張施冷然御風渺何之太君歲晏嘉子期
千秋萬歲受鴻釐皇圖景運永以丕手持芙蓉朝紫微
旋飈天闔此來歸彰靈答貺達爾垂磨崖鐫我瑤華辭

吳湛

字幼青號草廬臨川人翰林承旨

徐州懷古二首

籍也楚世將江東八千兵
傴僂脆肌骨上國足橫行
乘憤西入秦畫錦歸彭城
喑鳴千人廢諸侯莫敢爭
竟坐勇力亡漢以寃仁興

斯文六經後百世一昌黎
饑寒三十年一朝從隴西
生死終不名感恩報已知
徐牧亦何人燕樓貯歌姬
翩翩傷弓鳥誰暇擇木栖
丈夫出處難淚洒符離睢

別趙子昂

畸人坐書僻殊嗜流俗笑解絃三十秋已矣鍾期少近
賦遠遊篇上下四方小識君維揚驛玉色天人表伏梅
千載事疑讞一夕了詩究正始上白晝雲龍矯樂經久
淪亡忝管分毫杪瑟笙十二譜苦志諧古調科斗史籀
來篆隸楷行草字體成十家落筆一如掃草木蟲魚影
自植自飛跳曲藝天與巧誰實窺興突肉食肉眼多按
劍橫道寶鶴書徵為郎瑚璉悵清廟班資何足計萬世

日杲杲蹇驚勵十駕天下與君操

題閤皂山

漢吳仙跡兩峰齊欲拾瑤華路恐迷寶殿青紅疑地湧
林巒蒼翠接天低九重香案分雲篆八景琅函記玉題
仙鶴翔空清似水步虛聲在朶雲西

張養浩

字希孟號雲莊
老人濟南人

王內翰哀輓

束髮耽經晚益勤平生精力盡斯文前朝十老今餘幾

當代三王獨數君李賀屢煩韓愈駕羊曇空阻謝安墳
玉堂寥索人何在落日溪牕滿白雲

贈李祕監

至治間魯
畫御容

封章曾拜殿庭間凜凜丰儀肅九關回首橋山淚成血
逢君不忍問龍顏

文子方

次元復初韻送虞伯生代祀江瀆

成均十載攷遺經未識沙墩長短亭旌旆曉霞穿化日

文章秋月映華星
鳥鳴春盡岷江白
鶻沒天低隴樹青
四海車書今混一
摩挲劒閣重鐫銘

滕賓

號玉霄睢陽人
江西儒學提舉

感寓六首

宇宙忽空闊
飲馬萬里流
平生負兩眼
及此行寓州
天清健鶻運
木脫飢鷹投
長風吹海雨
濯我紫綺裘
相逢半遊俠
把酒髯如虬
慷慨說史記
歷歷山川秋
向來衣帶水
目短何無舟

吾愛東方朔高揖金馬門向非玩六合安肯來崑崙昂
昂九尺身談辨黃河翻誰知上書意蛾眉非自婚不見
馬相如俯首狗監恩人生非桃李何故不自言

吾愛李太白玩世如游龍自知天上謫何必人間容海
風吹綠髮蕭蕭卧雲松我昔夢見之遺以金芙蓉清輝
恍在眼月落我眉峰

西風桂花落我上天台山仙子扶我手冷然蒼水環乘
鸞者誰子飛烟渺難攀三生此遊戲弄影銀河灣空山

忽風瀑四顧鳴潺湲長揖馬子微此豈非人間

春風如綠波淡蕩洛陽柳高樓語錦瑟落花泛綠酒何
人白鼻騮蒙茸紫貂袖一字或未識銀菟懸兩肘煌煌
貝宮珠迺落緯蕭手爰居偶鐘鼓犧牛竟文繡終然同
一盡豈復論好醜誰知草玄者窮巷閉白首

船頭書十乘船尾酒百壺酒盡書在眼落月如明珠忽
悟八陣法縱橫如河圖惜哉經世士未有窺唐虞季子
相六國所見惟陰符

吟人

吟人瘦倚曲欄干
酒醒香銷午夢殘
燕子不來春社去
一簾疎雨杏花寒

劉祈

渾源人

古意

秋江有芙蓉
顏色好鮮潔
褰裳欲采折
水深不可涉
嚴風下飛霜
芳艷空凋歇
悵望一長歎
臨川無桂楫

送雷伯威

朔風起天末落木鳴空山
冰霜正凝沍遊子百里還
出郭送將別徘徊上高原
如何睽離情對此芳歲闌
壯士志四方不須涕洟瀾
人生非山海會面亦不難
願子崇明德餘功振文翰
長因東南鴻惠我金玉言

葉李

字太白謚文簡富
春人中書右丞

壽馮大使

帝遣皇華遠有光可能白首老中郎
雲臺偉蹟推馮異天榜魁名說馬涼
花柳無私春鼎鼎松椿不老歲蒼蒼

傳聞又攬澄清轡一道平反福更長

郝天挺

號新齋
官左丞

麻姑山

路入尋幽景便嘉石田瑤草帶烟霞注經洞古亡遺檢
養藥爐存失舊砂青鳥空傳王母信綵鸞應到玉皇家
巖扉不掩春長在老却碧桃無數花

李京

字景中
真定人

留別都城諸公

蒼龍雙闕鬱岩堯
曾侍鵷鸞趁早朝
往事已隨塵袞袞
虛名贏得鬢蕭蕭
長林豐草空相憶
瘴雨蠻烟苦見招
借問都門門外柳
為誰留著最長條

杜瑛

字文玉
號維山

弔故宮

月上觚棱椒壁濕
飢烏啄碎琅玕石
劫灰飛盡海揚塵
廢殿荒臺土花碧
洛陽書生汴梁客
一夜秋風頭欲白
尊中賴有酒如泉
醉倚寒牕破愁寂

秋思

壯心忽忽劇懸旌
秋氣偏令客子驚
白鴈不聞雲外過
清霜先向鬢邊生
銅駝巷陌周東土
金鳳樓臺鄴北城
千古繁華俱一夢
空餘草木戰風聲

征南口號

春早雲南麥已黃
瀘江蒸霧水如湯
馬蹄半帶陰山雪
變作人間六月涼

元音卷二